



Broj: 10-37- 9200/18  
Sarajevo, 14.03.2018.godine

**SKUPŠTINA KANTONA SARAJEVO**  
**-Služba za Skupštinske poslove-**

**PREDMET:** Odgovor na zastupničku inicijativu

Zastupnica Segmendina Srna Bajramović je, na 38. Radnoj sjednici Skupštine Kantona Sarajevo, održanoj 05.03.2018.godine, u okviru tačke Dnevnog reda „Zastupnička pitanja, inicijative i odgovori“, a u skladu sa Poslovníkom Skupštine Kantona Sarajevo, pokrenula zastupničku inicijativu za „proširenje liste ortopedskih pomagala u smislu podrške pacijentima sa malignim oboljenjima ili odnošenju odluke o refundaciji troškova kupovine istih“.

U vezi sa pokrenutom zastupničkom inicijativom, Ministarstvo zdravstva dostavlja sljedeći

**ODGOVOR**

Na osnovu člana 33. Zakona o zdravstvenom osiguranju, kantonalnim propisom se utvrđuje obim prava osiguranih lica na korištenje ortopedskih i drugih pomagala, stomatološko-protetsku pomoć i stomatološko-protetske nadomjestke, u skladu sa utvrđenom medicinskom indikacijom. Na prijedlog Upravnog odbora Zavoda zdravstvenog osiguranja Kantona Sarajevo, Vlada Kantona Sarajevo, na 37. sjednici održanoj 22. novembra 2007. godine, donijela je Uredbu o obimu, uvjetima i načinu ostvarivanja prava osiguranih lica na korištenje ortopedskih i drugih pomagala, endoproteza, stomatološko-protetske pomoći i stomatološko-protetskih nadomjestaka („Službene novine Kantona Sarajevo“, br. 38/07, 29/08, i 40/14), kojom su definisana prava osiguranika na medicinska sredstva.

Zbog određenih manjkavosti i uočenih nedostataka, Ministarstvo zdravstva Kantona Sarajevo je Rješenjem broj 10-02-2717/18 od 30.01.2018.godine imenovalo Komisija za pripremu novog Prijedloga Uredbe o obimu, uvjetima i načinu ostvarivanja prava osiguranih lica Kantona Sarajevo na korištenje medicinskih sredstava sa zadatkom da novi Prijedlog Uredbe bude usklađen sa Akcionim planom u oblasti invalidnosti Kantona Sarajevo, Zakonom o lijekovima i medicinskim sredstvima („Službeni Glasnik BiH“, broj 58/08), uzimajući u obzir analizu prava osiguranika na medicinska sredstva u zemljama u okruženju, sve zahtjeve i prijedloge dostavljene Ministarstvu zdravstva Kantona Sarajevo od strane udruženja čiji članovi, kao osigurana lica, ostvaruju prava na medicinska sredstva. Također, zadatak Komisije je i da sačini Prijedlog Uredbe kojom će se definisati obim prava osiguranika na medicinska sredstva, medicinske indikacije na osnovu kojih osiguranici Kantona Sarajevo ostvaruju prava na medicinska sredstva, način propisivanja i izdavanja medicinskih sredstava, rokove korištenja medicinskih sredstava, te utvrde standard za materijal od kojeg je medicinsko sredstvo izrađeno. Komisija je u obavezi da do 30. aprila 2018. godine izvrši uporednu analizu cijena medicinskih sredstava u zemljama u okruženju, te u skladu sa



tim predloži cijene i visinu učešća Zavoda zdravstvenog osiguranja Kantona Sarajevo u medicinskom sredstvu.

Prijedlog nove Uredbe, nakon izrade fiskalne procjene od strane Zavoda zdravstvenog osiguranja Kantona Sarajevo će biti upućen Vladi Kantona Sarajevo na usvajanje.

Prijedlogom nove Uredbe obuhvaćeni su svi zahtjevi dostavljeni Ministarstvu zdravstva, a zaprimljeni od udruženja koja okupljaju invalidne osobe, pa tako i zahtjev Udruženja „Renesansa“ za obezbjeđenjem kompresivnog materijala koji se koristi kod limfedema i to: kompresivni rukav, rukavica, čarape duge, čarape do koljena, te limfaset-kompleti kompresivnih zavoja za ruku i za nogu.

Ministarstvo zdravstva podržava dostavljenu inicijativu i intenzivno radi na donošenju propisa kojim će se definisati prava osiguranih lica na medicinska sredstva.

*S poštovanjem,*

**MINISTRICA**

**Zilha Ademaj dipl.oec**



**web:** <http://mz.ks.gov.ba>  
**e-mail:** [mz@mz.ks.gov.ba](mailto:mz@mz.ks.gov.ba)  
Tel: + 387 (0) 33 562-104, Fax: + 387 (0) 33 562-243  
Sarajevo, Reisa Džemaludina Čauševića 1

